

**Uunga siunnersuut: Timersorneq timigissarnerlu pillugit Inatsisartut inatsisaat nr. xx, xx. xx 2016-imeersoq**

(Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoq)

**Saqqummiussissut****Siullermeerinnineq**

Naalakkersuisut sinnerlugit matumuuna timersorneq timigissarnerlu pillugit inatsisartut inatsisissaatut siunnersuut saqqummiutissavara.

Inatsisissatut siunnersuut immikkoortunik pingaarnernik marlunnik isiginiagaqarpoq. Siullermik timersornerup tapersersorneqarnera, tassunga ilanngullugit unammilluni timersorneq aamma timigissarnerq. Aappaatut nakorsaatit pissassaaitut atorneqartarnerinik aamma unamminernik siumoortunik isumaqatigiissuteqarnernik pitsaaliuineq akiuinerlu.

Inatsisissatut siunnersuummi pingaarnertigut siunnerfigineqarpoq timersornermut tunngasut pisortat akisussaaffigisaattut erseqqinnerusumik inissisimalernissaat annertunerusumillu pingaaruteqalernissaat, tassunga ilanngullugit pisortani oqartussat timersornermilu kattuffiit immikkoortumi akisussaaffii erseqqinnerulersillugit.

Timersornermut tunngasut annertuutigit nukittorsarnissaat Naalakkersuisut anguniagaraat. Tassa imaappoq timersorneq timigissarnerlu. Naalakkersuisut isumaqarput timersorneq timigissarnerlu pillugit immikkut inatsisiliorneq anguniagaq taanna tapersersorniarlugu tunngaviussasoq pingaaruteqartoq.

Innuttaasut peqqissusiat, ingerlalluarnerat atugarissaarnerallu annertunerulersinnissaat anguniarlugu siunertami timersorneq timigissarnerlu pingaaruteqartuupput. Timersorneq timigissarnerlu aamma siunertarpassuarnut allanut pitsaasunut iluaqutaapput, tassunga ilanngullugit katerisimaarnerup ataatsimoornerullu nuannersuuneri kiisalu inuit oqartussaaqataanerannik pilersitsisarluni. Tamanna isigalugu Naalakkersuisut isumaqarput timersornermi kattuffiit suleqatigalugit pisortani oqartussat akisussaaffigigaat inuiaqatigiinni immikkoortuni tamani timersornerup timigissarnerullu siuarsarnerata qulakkeerneqarnissaa, tassunga atualersussani tunngaviusumillu atuarfimmi, ilinniagaqarfinni, sunngiffimmi neqerootitini, suliffeqarfinni aamma peqqinnissakkut isumaginninnermilu tunngasut ilanngullugit.

Peqatigisaanik Naalakkersuisut isumaqarput pingaaruteqartoq timersornerup timigissarnerullu nunami tamarmi kikkunnut tamanut ammasuunera pisortat timersornermi kattuffiit suleqatigalugit qulakkiissagaat, tassunga ilanngullugu inuit immikkut pisariaqartitsisut

siunnerfigalugit suliniutit tapersornerisigut aamma peqataanissamut aningaasaqarnikkut aporfiit annikillisinniarlugit suliniuteqarnikkut.

Timersornermut timigissarnermullu tunngasut nammineq kajumissutsit aallaavigalugit ingerlanneqartarpoq taakkulu pinngitsoorneqarsinnaanngillat. Naalakkersuisut isumaqarput immikkoortumi kajumissuseqarnermut tunngasut aalajangiussimaneqarnissaat ineriartortinneqarnissaallu pingaaruteqartoq taamaattumillu isumaqarlutik aamma pisariaqartoq pisortat timersornermi kattuffiit suleqatigalugit timersornermi timigissarnermilu tunngasuni kajumissuseqarlutik suliaqartunut tapersersuisoqarnissaanut pitsaasunillu atukkanik pilersitsisoqarnissaanut kajumissaarissasut.

Naalakkersuisut isumaqarput pingaartoq amerlasuut kiisalu pikkorivissut timersornerat tapersorneqarpata, tassunga ilanngullugit kalaallit timersortartut pikkorivissut nunani tamalaani timersornikkut aaqqissuussineranni qaffasinnerpaanik peqataasinnaanerat siunertaralugu. Peqatigisaanik Naalakkersuisut isumaqarput pingaartoq timersornerup timigissarnerullu ernumananngitsumik isumannaatsumillu toqqammaveqarluni ingerlanneqarnissaannik tunngaveqarneri aamma timersorneq timigissarnerlu peqqusersuinnermik, ataqqinninnermik akaarinninnermilu tunngaveqassasut. Tamanna ilaatigut nakorsaatit pissasaatitut atorineqartarnerinik aamma timersorluni unamminernik allanngortitsinernik, - aamma unamminernik siumoortumik isumaqatigiissuteqarnernik taaneqartunik - pitsaaliuineq akiuiniarnerlu pillugit maleruagassatigut pissaaq.

Taamatut oqaaseqarlunga siunnersuut kajumittumik Inatsisartunut suliassanngortippara.